

Schnitzel – Psalm

Värs I – XII
Fasnacht 2010



Am Ereffnigsdaag bin y au in das neje Stücki-Center gange
und bi deert in e Lift zem in's obere Stoggwärgg z'glange
und dä Lift isch voll mit Lyt gsi, no isch mer ebbis passiert, jetz miend'r loose
no isch mir pletzlich e lutte und vaterländische Furz in d'Hoose
no hänn mi d'Lyt aagluengt und y ha my schiniert und was machsch in däre
Situation
y ha s'Handy fire gno und gsait: gälled - y ha denn e gaile Glingeldoon

S' ka sy dass wemme duur d'Stadt lauft kunnt bletzlich sone Gsell
und sait zue aim, du loos emol, hesch mer e Stutz fir d'Notschloofstell
aber sit kurzem bättlet au e ganzi Gruppe, es sinn so 4 bis 5 mitenand
und trozdam's jetz verbotte isch - bättle die zämme in dr Stadt ummenand
falls ihr die emol naime aadräffet, miend ihr denn nit verschregge
s'isch numme dr Vorstand vom Charivari wo die hohli Hand aane stregge.

Unseri Granggekasse zieh'n uns no dr letscht Frangge uss dr Däsche
und das hämmer alles no däm Couchepin z'verdangge, däre Fläsche
fir e tieferi Prämie hani d'Franchise jetz uff 1'000 Stutz erheet
und jetz bini scho 2 Mool grangg gsi, jetz hani's denn abdrait, y bi jo nid bleed
jetz miesst my numme no im Drämmli yglemme und mitschlaiffe loo
denn wurde ebbe die eerschte 30 Meter no uff d'Franchise goo.

Y ha kirzlig im Flughaafe en alte Schuelfrind droffe
und dä isch schlächt druff gsi no hanen gfroggt, was isch dr iiber d'Lääbere
gloffe
waisch, jetz sinn grad eppe 30 Schwoobe in e Flieger gstiige, aber immerhiin
die sinn schyyns do arbetsloos worde und sinn zrugg in d'Heimat nach Berlin
dasch jo guet, jetz hämmer e baar weniger, wieso bisch denn so hässig hitt
zoobe
s'macht mi verruggt, in däm Flieger hätt's doch Platz gha fir fascht 300
Schwoobe.

Wo dr Merz uff de Gney bim Gadaffi bättled und ziggled
hett's em no d'Nase in de Schuehbändel vom Gadaffi verwigged
denn entschuldigt er sich, entschuldigung, entschuldigung und heert nid uff
und entschuldigt sich fir alles, do wird dr Gadaffi langsam muff
und sait: s'wird scho dunggel duss, jetz sottsch haim mit dir hett's kai Zwägg
und bim uuse goo putzisch denn im Gang no dini Schlyymspuur ewägg.

Die Mundschitz hämmer jetz nit bruucht aber do muess y grad no ain erwähne
und zwoor dä Playboy do, dä Karli Hirschmann, also dä Typ isch denn zem
gähne
und die Brobleem wo dä immer hett mit syne Models und syne Misse
und sy's lmitsch und syni Usstraalig isch jo sowieso versch...
aber sott's jetz do inne no Dame ha, wo sich fir dä Hirschkopf no intressiere
denn empfääl ych, legged denn soone Mundschutz a, denn ka's nid passiere.

Wägem Rauchverbott hänn gwiisi Baizer äxtra so „Fumoir's“ gschaffe
demit d'Raucher in däne Fumoir's denn glyych kenne paffe
aber s'gitt no vyyl ander's schlim'm's, wo d'Mensche grangg kenne mache
zem Byschpiel Lärme und Grach kenne Ooreschäade verursache
und will d'Guggemuusige in de Baize eso lärme, schränze und grache
kennte doch d'Baizer näbscht de Fumoire's au no so Guggoire's mache.

Z'Basel sait me DER Rhein - dassch männlig
und z'Ziiri sait me DIE Limmat - dasch wyyblig
und z'Basel sait me DER Bahnhof - dasch männlig
und z'Ziiri sait me DIE Haltstell - dasch wyyblig
z'Basel sait me DER Zolli - dasch männlig
und z'Ziiri sait me DIE Kaninchenausstellung -
dasch wyyblig
z'Basel gitt's DER Morgestraich - dasch männlig
und z'Ziiri sait me DIE Rääbeliechtlinacht -
dasch wyyblig
z'Basel sait me DER Apéro - dasch männlig
und z'Ziiri haisst's DIE Tränke -
dasch wyyblig
und z'Basel sait me DER Polizeikommandant - das
wär männlig
aber er kunnt vo Ziiri und isch wyyblig.

Wenn dr Gushti im Juli will dr Wiehnachtsbaum schmigge
und s'Trudy im Septämber will go Oschterglogge pfligge
und dr Max im Novämber will s'1. Auguscht-Fyyrwärgg abloo
und dr Karli im Februar an's Oggtober-Fesch will goo
dasch alles nit so schlimm, numme ain isch nit ganz bache
wenn wieder dr Merz im April sy Maibummel nach Lybye will mache.

My Hund isch kirzlig schlächt zwäg gsi und hett immer gjjault in dr Nacht
und är hett scho eppe zwai Daag lang kai scheene Stinggi me gmacht
no bini zem Tierarzt mitem und dä hett en welle rengege und duure tschegge
und fir soone Renggebild hätt y miesse 200 Stutz aane legge
dasch z'dyyr gsii, no han y gsait: y muess schnäll furt y bi glii wieder do
und bi schnäll uff e Flughafe und hanen deert gratis duur dr Scanner gloo.

Politiker, Muusiker und die vom Film, y main die in dr Prominätewält inn
die sinn hitt aifach anderscht, si sinn nimmi wie si no friehner gsii sinn
z.B isch dr Pitt e Brätt, d'Lady isch Ga-Ga und dr Johnny isch als Depp
geboore
und Brooke schiilt, Kate winslet und Demi isch e Moore
aber dass es au in dr Schwyz mit de Promis nit besser stoht
das gseht me jo alli Daag scho bim Bundesroot
denn d'Evelynn isch e Schlumpf und luegt wie dr „Garfield“ ummenand
kenntsch maine- si regiert im Wachkoma unser Land
was die d'Augedeggel z'wytt unde hett, hett'se d'Doris z'wytt offe
die isch mit ihrem Augeuffschlag uniiberdroffe
si hett ihri Glugger mänggmool nimm unter Kontrolle
und zem d'Lytt verschregge losst si se denn e zytlang lo rolle
und vom neije do vom Burki – was dä so macht weiss y nit
vo däm weiss y aigentlich numme dass es en gitt
und d'Micheline Calmy reyeret und kunnt bim Laie-Moritz nit aa
si hett halt immer no dr ganzi Daag dä alti gstraifft Velohelm aa.

Wottsch au by uns bänggle?
Schigg doch aifach e Brief in unser Boschtfach
VSG Postfach 4365 4002 Basel
Oder goosch uff: www.vsg-basel.ch
